



Komunikado di prensa 2020-032

CBCS ta promové maneho di sèn efektivo durante Luna di Edukashon Finansiero

Willemstad/Philipsburg: E aña aki *Centrale Bank van Curaçao en Sint Maarten* (CBCS) ta organisá e "Luna di Edukashon Finansiero" pa di dos aña konsekutivo den luna di novèmber. Durante di e Luna di Edukashon Finansiero ta pone atenshon na e asuntunan finansiero ku ta dediká pa hasi nos komunidad finansieramente mas resistente. Tambe lo dediká atenshon na e funshon i importansia di CBCS pa e sistema finansiero i pa nos komunidad. CBCS ta entusiasamá pa tur aktividatnan ku lo tuma lugá durante di e Luna di Edukashon Finansiero.

Den e **promé siman** di novèmber, CBCS ta enkurashá komunidad di Kòrsou i Sint Maarten pa hasi uso di un presupuesto (pa famia). Pa fasilidat esaki CBCS ta brinda un ehèmpel di un presupuesto ku por wòrdu adaptá, den 3 idioma riba su wèpsait. Pa asistí CBCS tambe a produsí videonan di animashon pa splika paso pa paso kon pa yena e presupuesto.

Den e **di dos siman** di Luna di Edukashon Finansiero CBCS ta organisá dos seminario riba e tema di "resistencia finansiero". E promé seminario (12 di novèmber) ta organisá den kolaborashon ku University of Curaçao (UoC) i lo brinda presentashonnan di ámbos instituto. E seminario aki ta dirigí riba studiantenan i esnan interesá den estudionan finansiero. E di dos seminario (13 di novèmber) ta organisá den kolaborashon ku International Organization of Securities Commissions (IOSCO) i ta konsistí di presentashonnan di CBCS i otro reguladónan di e region Karibense. E seminario aki ta destiná pa reguladónan i ekspertonan finansiero. Ámbos seminario lo sera ku un pènel di diskushon ku ta duna oportunidat na partisipantenan pa hasi pregunta. Pa medio di e página di Facebook di CBCS lo duna mas informashon relashoná ku e seminarianan aki.

Den e **di tres siman**, CBCS ta sostené diferente aktividat di Global Entrepreneurship Week (GEW) ya ku edukashon den área empresarial tambe ta forma parti di edukashon finansiero. GEW ta organisá un *bootcamp* i un kompetensia di presentashon pa empresarionan di Kòrsou i Sint Maarten. Alabes lo tene un kompetensia di debate entre studiantenan di skol sekundario i studiantenan universitario. E temanan di e debate tin di aber ku 'metanan pa un desaroyo sostenibel' (konosí komo Sustainable Development Goals òf SDG).

Den e **di kuater siman**, CBCS ta ofresé charlanan interaktivo virtual na studiantenan di skol sekundario. E charlanan tin di aber ku e tema di ‘Gasta i presupuestá efektivu’ i ‘Spar i invertí efektivu’.

Ku a inisiativanan aki, CBCS ta deseá duna un aporte positivo na e krea resistensia finansiero i ku esei un komportashon finansiero responsabel den e komunitatnan di Kòrsou i Sint Maarten.

Pa mas informashon tokante di e Luna di Edukashon Finansiero òf e otro seshonnan ku CBCS ta brinda den kuadro di edukashon finansiero, por tuma kontakto ku CBCS pa medio di e-mail na info@centralbank.cw.

CBCS ta enkurashá pa bishitá su wèpsait www.centralbank.cw i su página ofisial di Facebook pa keda na altura di tur aktividat ku e ta organisá.

Willemstad, 2 di novèmber 2020

CENTRALE BANK VAN CURAÇAO EN SINT MAARTEN